

四庫全書

史部

欽定四庫全書

史部

江南通志卷四十二

詳校官給事中臣丁雲錦

檢討臣德生覆勘

總校官編修臣王燕緒

校對官中書臣范鰲

謄錄監生臣李如梓

欽定四庫全書

江南通志卷四十二

輿地志

壇廟

六祠墓附

廬鳳潁三府滁和廣六泗五州

廬州府

社稷壇在府治西門外

風雲雷雨山川壇在府治南門外

先農壇在府治東郊雍正四年遵建

郡厲壇在府治拱辰門在縣曰邑厲

里社鄉厲二壇在各鄉保

關帝廟在府治和平橋東

國朝雍正五年奉

旨追封三代公爵春秋同日祭於後殿

城隍廟在府治東

勅建八蜡神廟

劉猛將軍廟俱在府余公廟橋東

以上壇廟所屬州

制

旗纛廟在武教場

將軍廟在府治水西門內城上祀宋少保楊沂
中

姚李二公廟在府治德勝門外祀宋統制姚興
招撫使李顯忠

巢湖聖妃廟在合肥縣姥山晉太康中建相傳
居巢縣地昔有一巫嫗豫知未然所說吉凶咸

有徵驗居巢縣門有石龜巫云若龜出血此地
當陷為湖未幾鄉邑祀祭有人以猪血置龜口
中巫嫗見之南走回顧其地已陷為湖人多賴
之為坐立廟今湖中姥山廟是也唐羅隱有詩
廣惠廟在廬江縣東南四十里礬山之陰祀漢
張渤元至正間建

靈澤廟在無為州蜈蚣山祀漢昭烈后孫氏賜

額曰靈澤

附

明郭子章蜀望臺記

蕪江心有磯磯不甚雄聳

顧獨嶙峋峭麗兀突浮水上與孤山金山後先
砥狂瀾蓋蕪一大勝聚云磯上祠孫夫人孫夫
人者漢先主牧荊州內孫仲謀女弟而妻之者
也磯夫人死所也夫人業已妻劉死不劉而孫
不蜀而吳即吳不宮而磯按志論者二曰夫人
還省母過灤江聞先主崩蜀推哭自沉又曰劉
孫有郤夫人歸吳舟殲磯側不忍見仲謀遂殞
於磯王義烏公作蜚磯記事語甚辨具載磯志
中而卒罪陳壽銓叙之畧予謂畧不在壽在蜀
蜀有國不設史官故典率逸亡考非然某年夫
人如吳某年夫人在吳某年夫人卒吳例得書
而何竟溷溷若斯起千載人疑哉故夫人死事
可亡辨已夫人死今數千歲後凜凜乎生氣微
獨蕪中人靈威神明即千艘萬航過磯者誰不
停橈而血饗之至獻歎悲悼不忍去非夫嬌節
貞心英聲義魄動天地感鬼神惡能以其抔土

卷石羈客子心而下其無從之涕故予謂夫人之死劉無疑也歸吳者形沉磯者骸而其一念之靈明猶若翱翔乎永安之左右而緹縵野馬於三峽五岷之巔際逐波錦江隨雲玉壘每風號吳天月冷荆水像響如在精魂可悲嗟乎哀矣余來視權逡巡故事三日謁祠下愴愴低回者久之獨怪其土偶桃梗充斥宇階若一叢祠然而夫人所為死者不得並殂且其間非失人意為左像玄德右像夫人築層臺居之名曰望蜀臺余往遊燕趙過鄒魯墟謁孟廟既覩于輿石像跪伏母前最後又祀其父若母讀楚書滿湘皇英廟貌九嶷而儼然在位受二女果者非大舜氏耶合而祀之庶幾乎義矣且也金陵故劉氏土孫氏乘亂而竊据之玄德飄泊蜀隅生不能驅許昌武昌二賊一完祖宗舊物白帝遺恨死且不瞑余為招魂俾與夫人世食茲山嗟

嗟玄德其能無愉快也耶臺高二丈六尺廣八丈中奉玄德夫人左祠關雲長張翼德右祠臥龍先生諸葛孔明又所以擁衛神靈且杜夫非鬼而祀於其中者

汪越公廟在無為州祀唐汪華

巢湖神廟在巢縣銀瓶山上

姚王廟在巢縣東山頂祀宋統制姚興

伏羲廟在巢縣西北東山口浮槎山頂

忠義祠在學內

節孝祠在府治

二祠所屬州縣俱如制

包孝肅祠在府治南濠內祀宋包拯附明黃金

孝肅書院記

包孝肅公宋之名臣也其精忠直諫可比漢之汲長孺而過之視唐

魏鄭公出處尤正其廉節冠一時趙清獻而下不論也其載諸宋史者炳炳與日月爭光其傳與天地相為悠久卓乎不可尚已第公為廬人仕於廬者往往以簿書期會為心求能表章先賢以風後進則寥乎未之有聞監察御史陽城宋君克明來守是邦未踰年六事漸舉百廢具興謂公乃鄉賢顧可漫不加之意乎郡城有河河之中有洲舊為浮屠氏所據太守至是撤而去之因相其地庀材陶瓦鳩工事事南面建屋五間中坐公之像東西翼以夾室植竹木於四圍而環之以牆前建大門其地峻疊石為梯數十級登焉題其額曰包公書院新傑壯偉過者

為之改觀擇俊張福輩十餘人讀書其中而
公二十四世孫大章亦與焉太守嘗於祭畢謂
諸生曰士學宜師聖賢若公乃表表焉百世可
師者也吾欲爾曹居家行已則師公之孝立朝
事君則師公之忠庶不負建新院之意福輩奉
教惟謹間以書來屬予記之嗚呼為政貴識大
體不務末節嚴先生祠堂范仲淹構之韓昌黎
潮州廟王滌新之以其所關者大也孝肅之風
足以廉貪立懦其有功於名教大矣不比之重
而務其他可乎太守善數乃及於是有所以激人
心而觀風化可謂得其大體與況其所費悉出
自規畫一無所取於民其才之長又有過人者
繼自今廬之士氣丕振或以直諫顯或以廉節
著忠臣孝子之門上紹先賢之芳躅未必不由
此舉基之是太守亦有大
功於名教也於是乎書

余忠宣公祠在府城東門外祀元余闕

附

明李

東陽記

正德改元之歲知廬州府馬金言元故淮南左丞余闕當至正之亂分守安慶

誓死血戰為江淮保障及陳友諒趙普勝諸軍合攻陷其城乃引刀自刎死並其妻妾子女將佐士卒無一辱於賊者其事甚偉當其時已贈行省平章事趙國公諡忠宣國朝洪武初始詔廟祀於死所闕雖出蒙古而所居合肥青陽山故宅亦有祠久不治惟漢紀信生於西充死於滎澤唐許遠生於新城死於睢陽文天祥生於廬陵死於柴市而今皆兩地並祀若闕之精忠大烈可方文許較諸紀氏蓋百倍過之而鍾靈毓秀之地不得為郡縣所祀子弟所仰其為禮亦甚缺請修葺舊祠秩諸常祀復其守者比於安慶以昭一代之盛詔曰可於是重修廟寢堂

室暨凡物所有事者令縣正官以歲春秋再致
祭焉於戲綱常之道根乎天性具於人心無時
與地而或間故居不必中國世不必正統忠臣
義士往往有之漢唐宋之死節者代有其人而
宋季尤甚說者以為忠厚養士之報元之以大
魁死者四人其他崇名顯仕者後先相望忠宣
以一郡之弱二千人之寡抗東南數萬之衆戰
至於七十之多歲至於六七之久而竟不失其
正以死又能使一門五節闔郡之士從而死者
千餘人較功論烈尤大且著者也我明祖高皇
帝綏猷惇典著為律令以表古今之忠義至其
所驅逐所勘定者亦不以君廢其臣而表章之
此可見綱常之道雖出於天而立教以治世者
固聖人事也又以見忠義之激於中者苟自盡
於所事皆可謂不失其正者也抑聞高皇於庸
敏裸將之士雖包荒含垢而實有宋太宗范質

之憾充類至盡無異於武王封比干釋伯夷之義矣而況為其主而死於亂賊之手者寧不表之以為天下教哉然則忠宣之重表於今日者亦豈非詒謀示法之大端也哉族祖希蓮先生與忠宣同舉進士分左右榜而唱名謝恩皆同班序雅相厚世所傳青陽集者先生實序之而以不得歿死為忠宣愧東陽仰窺聖主之仁復有感於先世之誼因表其事且以風天下之為人臣者若忠宣之族里行績則見本朝所著元史及潛溪宋學士傳為詳博雅君子尚有考焉

周忠愍祠在府治明教臺東祀明周璽

附明榮

逢春記

余讀廬陽誌列忠節者自漢周平孫而下迄於我明曹瑞卿屈指蓋三十一人

瑞卿跡其行事宜列之其剛直二十八人皆以亂畧之頃激大義抱忠憤而為敵所殲者至以

直言而斃則惟我朝周忠憤李崇德兩公焉豈
時當草昧則人心易激忠義慷慨之士多而居
常往往養位酣祿緘默株守之士衆乎不然何
死敵者餘什九而以直諫死者不什一耶兩公
者以忤武宗斃於杖下崇德語在他傳中若忠
愍則以忤逆瑾故肥之兒童婦女無不嘖嘖蓋
公被拷掠身無完膚矣猶弗少屈曰吾死不足
惜令忠義畏愾可惜耳斯言也豈古所稱君子
人與蘇明允云使我獲知人之明而天下受不
可一朝居之禍不忍也充忠愍之意使其成殺
身之仁而杜天下敢言之口不忍也為宗社生
靈計而非為一身後區區之名詎不賢哉公祠
碑記尚缺公之孫弟子員於德因蓬萊浦君以
請益浦君以六安貳署肥事也余按忠愍與瑾
黨楊玉勘事弗阿弗徇瑾惡之遂罹此慘假令
忠愍少假之辭色縱不得其懼心亦可免禍而

忠愍不以彼易此里有富翁羣儂蓋日至摩踵以承之其後至者則摩其摩者之踵一儂獨愕然而進長揖而與之坐語羣儂皆愧而驚走忠愍者其不摩踵之流與忠愍即死而國家忠義之氣藉是以扶持而不墜其功宜小補哉浦君為此請者浦之先君以忤世廟被杖尋卒於獄夫世廟之聖明不世出者於忠愍有抑鬱未伸遽焉淪沒之旨如此而於浦公又如彼豈日月之明或蔽寸雲而雷霆之威偶推直木者乎君其有所感夫有所悲夫

蔡氏祠在府治十字街東祀明蔡悉

屠公祠在府治察院前祀明太守屠仲律今廢
宣聖南祠在廬江縣宣聖五十八代孫孔思原

徙廬江建家廟春秋祭如學宮儀

大忠祠在廬江縣祀明靖難死事陳植

二賢祠在舒城縣內祀漢文翁朱邑

三劉祠在舒城縣東祀漢馮異侯劉信刺史劉

馥明知縣劉顯

二狀元祠在無為州祀州人宋元豐狀元焦蹈

明永樂甲辰狀元邢寬

楚公祠在無為州祀宋待制楚建中

附

宋趙汝

談記

郡故祠賢守三曰王公遂陳公薤米公節王公蘇黃門之婿適之之兄也為吏健於

才紹聖初為郡人興三圩開十二井又築北嶺以捍水至今蒙其利陳公坐論蔡京錄右司諫斥謫尋起郡復罷其政猶未洽比土也邦人以其天下士而吾里乃幸辱焉故誇以為榮而米公則翰墨妙當世在郡所作樓觀皆手自題其扁民每瞻思之余謂是三賢者祠之當矣然考諸圖志則先是楚公建中嘗守此其治一以清靜不擾去之日有遺愛而獨缺其祠豈不忽諸余反覆其說而得焉西都所傳循吏無惠文時人豈惠文世無良吏哉其故可思矣嗚呼國家慶歷嘉祐間天子垂衣裳執大象羣有司奉法循禮而海內宴安無事田不盡利也而食有餘於飽井不盡甘也而飲有餘於味上下數十年間其布政郡國者大抵非博厚長者即忠信善

士也故雖以楚公之才學亦不刻厲涌發以求
自判於常人而民所以懷公者亦惟此心不祈
表於外也嗚呼獨非盛德之至歟王公既錄功
食二公因復名饗蓋其次第如此而楚公遠矣
顧有輕重乎哉今中興以淮為邊而無為創前
之敵難未遠也衆懼莫敢即安淳熙末公私始
稍稍鳩聚若欲自況內郡者而開禧戎事動矣
汝談之來承乏此地流宕者未返瘡痍者未瘳
府無旬月之儲而宿負新貸符督交至余熟視
莫知其為也喟然嘆曰時安得復有楚公者以
為爾民父母其庶乎而余劣不足進此矣於是
議追為公之祠以記公行事而歷訪乃無一得
益公既不以名蹟遺後故遺老亦無傳者相距
三甲子矣嗟乎以余之淺陋曾何足知公而區
區企竦歆慕如將見之者徒以文正范公所薦
而文富司馬諸公之所遊也公既老以天章閣

待制歸雄世所傳者英圖有公像余因得取之
其出處大致在國史不論第論世道本末使知
前無祠於公不為少而今有祠不能為公多使
人知夫翹翹之名察察之行凡為一世之所慕
耀而爭趨者皆
公之細焉爾

賈公祠在無為州祀宋賈易

二賢祠在巢縣萬家山麓祀巢父許由

范亞父祠在巢縣治內祀范增又一在縣東七
里

居巢子祠在巢縣學內祀劉知幾

甯公祠在巢縣北關內祀明知縣甯承勳

漢顏羹侯劉信墓在舒城縣北四十里

五代伍喬墓在廬江縣馬廠岡

宋學士劉鈞墓在府東水西門外

太子少保馬亮墓在府城西七里晏殊銘

侍郎包令儀墓在府東七里

叅政包拯墓在府東十五里

附宋林至記

至為淮西

從事之三月始得再拜謁孝肅包公墓下嗚呼
慶歷嘉祐之間何其盛也仁宗皇帝以天地高

厚之德平治天下而又延登者雅容納忠讀維
時孝肅公危言直論排斥權倖切劘治道而扶
持國本者覩奏疏可考焉至其臨政明不可欺
剛不可撓公不可干以私今百餘年所在士民
聞其風采猶知起敬起畏合肥公之鄉里也中
更兵火子孫流離故宅廢為民居獨廟祀存焉
今去城十五里所謂東村原者公之墓也去皇
考侍郎公墓七里每歲春秋教授縣令即諸生
往修歲祀然丘封半頽塚木剪拔擔夫牧豎往
來莫禁甚者至蹊其墓田欲奪而有之嗚呼以
忠賢端士而報施乃爾豈天道耶或兵革之後
未能遽復耶教授丁君端祖縣令潘君友丈相
與鳩工斂材次第脩治會部使者王公補之來
攝帥事即以聞公為之惻然不踰月斥公帑助
其役費繚以周垣方一百五十五步舊剔棘蓬
植藝松檜祭饗有堂墓道有門碣墓記載雖不

復存立表署阡往來其下者皆知為孝肅公之墓曜然加敬風動一鄉而又正其墓禁直其田之訟歸之包氏使歲時奉烝嘗所以竭虔妥靈者厚矣嗚呼仁人君子固有不幸而不能保其後也世人不察猥以天道報施之不常以起為善者之懼而不知君子之澤雖曰五世而斬至於流風餘韻聞者為之興起孰使之然哉扶持風化調護其子孫此正吾人責也可捨此而謂天道是耶非耶公之元孫邦直朝廷蓋嘗命之官今雖老不能仕而州縣之間經紀其存歿者可獨為包氏計耶風化所係多矣至於連帥之命告成於公墓而且屬筆以記其事公之勲德載在國史此不復論姑序其本末以為後勸云

御史李公麟墓在舒城縣南五里

魏國公王之道墓在無為州開城鄉相山

樞密使王藺墓在無為州開城鄉軒車山

侍郎賈易墓在無為州西三里

郎中雙漸墓在無為州西門外三里

狀元焦蹈墓在無為州西三里

方孝子墓在無為州北三里

元學士葛聞孫墓在合肥縣水西門外

明尚書蔚綬墓在府城時雍門外花橋側

都御史張淳墓在府城南門外

安陸侯吳復墓在合肥縣北鄉

都督僉事瞿通墓在合肥縣土山

指揮王瑛墓在合肥縣店埠鎮

知府孫鎮墓在合肥縣西南

叅政程楷墓在合肥縣西門外方家岡

順天府丞周璽墓在合肥縣西門外三里

尚寶司蔡悉墓在合肥縣城東八里岡

布政使竇子倩墓在合肥縣城西十字山

太常少卿朱來違墓在廬江縣南沙湖山麓

御史盧謙墓在廬江縣東二十里

侍郎陳植墓在廬江縣白石山麓

少詹胡守恒墓在舒城縣南椒子沖

左長史祝富墓在舒城縣西南打石山後

侍郎鄭泰墓在舒城縣東三里

尚書鄭時墓在舒城縣東四里

尚書秦民悅墓在舒城縣金雞墩

侍郎吳光義墓在無為州葛公山

叅議吳廷翰墓在無為州南轎子灣

尚書薛祥墓在州西門外

尚書薛遠墓在祥墓右

狀元邢寬墓在州西三里

叅政朱昂墓在州南十里

叅政李春墓在州南十里

巡撫劉崙墓在無為州南平頭松

通政朱萬春墓在巢縣城西先葬無為州遷今

處

光祿寺卿曹琬墓在巢縣河之南牛角山

國朝禮部尚書龔鼎孳墓在合肥縣巢湖菴後

通政司叅議王剛墓在合肥縣駱家廟

大學士李天馥墓

鳳陽府

社稷壇在府城西門外

風雲雷雨山川壇在府城南門外

勅建先農壇在府治東郊五里雍正四年遵建

郡厲壇在府城北

在縣曰邑厲

里社鄉厲二壇在各鄉保

關帝廟在府治荆山麓

國朝雍正五年奉

旨追封三代公爵春秋同日祭於後殿

城隍廟在府治西南

勅建八蜡祖廟

劉猛將軍廟並在府治獨山門東五里

以上壇廟所屬

州縣皆如制

旗纛廟在各衛所

龍王廟在府治獨山門東五里定遠縣東北十五里泉塢山北亦有此廟禱雨輒應

禹廟在府治塗山頂

附

明劉俊重修廟記

神禹氏功

德萬世永賴不可泯者也。有廟祠之者塗山有
二一在越之會稽山一在淮西濠州鍾離縣西
九十五里左傳杜預註塗山在壽春東北有禹
會村輿地記載濠州塗山氏之國蘇轍王韶過
濠州俱有詩蓋鍾離濠州治也即今之臨淮縣
壽春即今之壽州懷遠縣乃鳳陽屬邑而隣於
壽州縣之南距淮河三里許有山高聳特秀上
有禹廟與杜預註輿地記合焉考於書輿輿地
記徵於杜預註與蘇王之詩則塗山之在懷遠
縣者無疑矣若會稽則禹晚年巡狩駐蹕茲山
東南諸侯亦來朝則後之會諸侯為會稽山前
之會諸侯為塗山夫何疑哉今二州皆祠之者
會稽則以禹陵在縣塗山則以其娶於斯而治
水始焉要之皆崇德報功也今廟在懷遠塗山
者前楹三間中祠禹王左右羽士所居近益後
楹三間中祠真武景泰改元鳳陽太守仲公承

制命祭於神見祠宇圯廢命任持羽士許得智
募緣葺之今年春燬於回祿仲公責其完復得
智殫厥心力鳩工經營煥然一新太守以書來
南京請記之夫祀神治民守之先務仲公致意
禹廟而拳拳以文為請其事神誠敬何如哉予
故詳列經傳所紀而明辨之俾來者不惑於塗
山之說且知朝廷與鄉人所以享
祀者在於尊尚道德不忘其功焉

夏后啓廟在府治荆山頂漢高祖過此命立廟
相山廟在宿州西北九十里相山之巔晉太康
五年令諸侯祀界內山川因建自宋元豐至明
洪武凡五修

女媧廟在靈璧縣北門外

文昌閣在府治西南樵樓上

忠義祠在學宮內

節孝祠在學宮旁

二祠所屬州縣俱如制

名臣祠在府學祀明戶部尚書年富

楊公祠在府治荆山巔祀楊瞻明嘉靖間改建

於兩山書院

彭祖祠在臨淮縣雲母山

三侯祠在懷遠縣儒學祀何立陳邦翰潘登貴
貞烈祠在懷遠縣治西南祀花將軍妻郤氏諸
人

包公祠在定遠縣治西祀宋包拯明永樂初建
留犢祠在壽州城內西南隅祀漢令時苗

謝公祠在壽州北八公山祀晉謝康樂

董子祠在壽州南正陽鎮祀唐董邵南

閔子祠在宿州北七十里閔子鄉之騫山南明

成化間重建

二忠祠在宿州東月城祀張巡許遠

三忠祠在靈璧縣西祀明殉流賊難知縣陳伯
安主簿蔣賢壽州指揮錢美

明舊陵淳皇帝后在鳳陽縣太平鄉

夏臯陶墓據漢書廣覽云在六安縣壽州界

周楚令尹孫叔敖墓在懷遠縣塗山東魏任城王
元澄為揚州刺史鎮壽春下車封孫叔敖之墓

左史倚相墓在壽州南五里

趙將廉頗墓在壽州八公山下按史記頗一為
楚將無功卒死於壽春今隸新分鳳臺縣界

先賢宓不齊墓在壽州東南鐵佛岡據周志相
傳子賤為魯使吳卒葬此未詳

先賢閔損墓在宿州北七十里閔子鄉騫山前
墓前有祠按家語閔子魯人卒葬歷城東五里
明一統志載在蕭縣今姑從舊志存之

漢少傅桓榮墓在懷遠縣龍亢集北五里

給事桓譚墓在宿州沛地元和中肅宗東巡至沛使使者祠譚塚鄉里以為榮

唐鄂國公尉遲恭墓在定遠縣東八里石羊岡

明十王四妃墳在鳳陽縣西北二十五里壽春王

霍丘王安豐王蒙城王下蔡王六安王寶應王

來安王都梁王英山王壽春王妃劉氏霍丘王

妃翟氏安豐王妃趙氏蒙城王妃田氏名白塔

墳

駙馬王琛墓在白塔墳南

尚書單安仁墓在鳳陽縣西北長淮衛

尚書顧佐墓在鳳陽縣朝陽門北

尚書郁新墓在臨淮縣東古城

安平侯李遠墓在懷遠縣西山底村

都御史周銓墓在懷遠縣荆山南麓

尚書年富墓縣北清溝旁

指揮常榮墓在縣賈村

東川侯胡海洋墓在定遠縣東南四十五里

崇信伯費獻墓在定遠縣北一里

都督李勝墓縣西三十里

都督趙清墓縣東四十五里

都督高智墓縣東六十里

都督朱崇墓縣西六十里

尚書苗衷墓在縣西十里清澄灣西岡之原

徐王墳在宿州北閔子鄉龜山左豐山右葬明
高皇后父洪武間立廟於瑩城之南設墳戶九
十三供灑掃

衛國公鄧愈墓在虹縣南二十里龍宿溝
知縣何誠墓在虹縣永濟門外

尚書陳翌墓在虹縣東門外

叅政王楫墓在虹縣東二十里

侍郎劉繼文墓在靈璧縣東關二佳山

潁州府

社稷壇在府治西

風雲雷雨山川壇在府城南門外

勅建先農壇在府治東門外雍正四年遵建

郡厲壇在府治西

在縣曰
邑厲

里社鄉厲二壇在各鄉保

關帝廟在府治東門

國朝雍正五年奉

旨追封三代公爵春秋同日祭於後殿

城隍廟在府城北

勅建八蜡神廟

劉猛將軍廟俱在府治

旗纛廟在府治衛所後

岳武穆廟在蒙城縣西北三十五里

忠義祠在學宮內

節孝祠在東關外

二祠各州縣俱如制

張龍公祠在府城東三十里祈雨輒應

附宋蘇

軾記

昭靈侯南陽張公諱路斯隋之初家於潁上縣仁社村年十六中明經科唐景龍中為

宣城令以才能稱夫人石氏生九子自宣城罷歸常釣於焦氏臺之陰一日顧見釣處有宮室樓殿遂入居之自是夜出旦歸歸輒體寒而濕夫人驚問之曰我能也夢人鄭祥遠亦龍也與我爭此居明日當戰使九子當助我領有絳綃者我也青綃者鄭也明日九子以弓矢射青綃者中之怒而去公亦逐之所過為谿谷以達於淮而青綃者投於合肥之西山以死為龍穴山九子皆化為龍而石氏葬開洲公之兄為馬步使者子孫散居潁上其墓皆存焉事見於唐布衣趙耕之文而傳於潁間父老之口載於歐陽文忠公之集古錄云自景龍以來潁人世祠之

於焦氏臺熙寧中刺史王敬堯始大其廟有宋
乾德中蔡州大旱其刺史聞公之靈築祠於蔡
既雨翰林學士陶穀為記其事蓋自淮南至於
陳蔡許汝皆奔走奉祀景德中建議大夫張秉
奉詔並新穎上祠宇而熙寧中司封郎中張徽
奏乞爵號詔封昭靈侯石氏柔應夫人廟有穴
五往往見變異出雲雨或投器穴中則見於池
而近歲有得蛻骨於池者金聲玉質輕重不常
今藏廟中元祐六年秋旱甚郡守龍圖學士左
朝奉郎蘇軾迎致其骨於西湖之行祠與吏民
禱焉其應如響乃並
治其廟作碑而銘之

歐陽公祠在府學西祀宋歐陽修

劉侯祠在府治東祀宋劉琦

報功祠在府城中祀宋將劉錡配以陳規汪若
海其副將趙樽許清曹成閻充耿訓韓宣祔享
三忠祠在府城東關祀元忠臣李黼及兄冕子
秉昭

六貞祠在府治東關祀漢烈婦范滂母明節婦
陳海妻李氏李深妻劉氏周雨妻韓氏時銓妻

李氏魏隆妻烈婦張氏

附

明胡袞記

考於賴得貞婦六焉

其一曰范母子孟博也慨然澄清甘死如飴而
母能勉之以正臨決數語凜然不以老壽易令

名可謂知所擇矣夫是之謂貞次時銓妻李氏方銓之歿李甫年十四越月而生孤用則紡績以撫用既長而娶生鯨而用夫婦又相繼逝矣七十二年艱難百狀卒撫鯨以永時祀次周雨妻韓氏年十七歸雨歸二年而雨卒韓守志五十九年如一日雖父母不能奪次張恭女年十七適魏隆甫四月而逆七犯穎被擄劇罵不辱而死夫是四者皆貞也次曰劉氏舍餘李深妻也其寡之年祝韓其志與其壽視時李氏加三齡焉雖未亡而墓木拱矣是亦貞也於是陳州之陳海妻李氏潁州人也夫卒辛勤事病姑以孝稱教子以祿養終焉雖歿於陳州而自出則潁也夫春秋魯史也宋共姬紀伯姬之賢大書不一書內女也因著教焉然則李氏之宜傳於潁無疑矣夫節義在天地間如水行流地未嘗一日息潁六貞據今日所見聞乃得其五邇

元而上僅一人而已豈貞烈之婦不必聞於時
或雖聞而無為之傳者世久人湮與其聲而俱
泯耶嗣今不傳則六貞者將久而泯泯如所云
亦未可知也修飭先生既祠三忠安神有日矣
三忠之南數十步有祠不載祀典則撤之而加
新焉其制如三忠其工費可相彷彿其坊曰六
貞祠成郡人士咸喜風教之振忠貞之氣將並
昌矣爭礱石於祠俾哀為之記哀既與有風教
責敢不詳志
以示勸哉

管鮑祠在潁上縣明知縣屠隆建

三忠祠在潁上縣祀明僉事李天衢兵備謝肇

鉉縣令廖維義皆捍賊有功

女忠祠在霍邱縣治東祀明殉義黃氏李氏陳氏

湯陵祠在亳州北渦河二里以伊尹仲虺配建太甲祠于後以伊陟咎單配

巴延祠在亳州東義門鎮元至正時巴延為城父縣達魯噶齊捕賊至福寧鎮為賊所害後人立祠祀之

三烈女祠在亳州城祀魏曹淑妻令女海秀妻

李氏毛繼妻宋氏

萊公祠在太和縣祀宋冠準

趙公祠在太和縣祀明趙夔報始築邑城也

莊子祠在蒙城縣祀莊周宋縣令王兢建

七節祠在蒙城縣東南祀謝氏等七節婦共挽而死

表貞祠在蒙城縣祀節婦盧李謝丁韓王韓莊田牛劉許周許蔡劉魏李劉李季烈女韓戴時等

二十四人

商湯陵在亳州北皇覽云湯冢在濟陰亳縣東北
郭去縣三里按括地志云洛陽偃師縣東有湯
冢近桐宮則是去州尚遠未敢信其必在亳也
周齊相管夷吾墓即潁上縣管仲墩在北關大寺
後明屠隆有碑

秦上卿甘羅墓在潁上縣城東五十里潁河北岍
漢山桑侯王常墓在蒙城縣檀城內

晉吏部畢卓墓在府治西二百一十里

元宰相張弘略墓在亳州東十里渦河南

平章摩該墓在太和縣東一里

明御史大夫安然墓在府西關外

尚書李敏墓在府治西瓦店

光祿張泌墓在府治西楊橋集南

叅政韓璽墓在府東門外郝家窪大教場

叅政郭昇墓在府治東

僉事李葵墓在府治東七里岡

僉事儲珊墓在府西湖東南

推官盧翰墓在府河北岸

御史張光祖墓在府治西七里河東岸

通判尚爵墓在府治西里許

給事王謨墓在府留陵河東南

布政王之屏墓在府治東嶽廟東檀家湖東北

布政王道增墓在府治東嶽廟東

同知白夏墓在府治東南陵口東白家屯

知府徐治民墓在府城東三里灣

布政劉光九墓在府城東七里鋪

尚書張鶴鳴墓在府治西湖南

副使張鶴騰墓在府城西七里河東岸

布政章順舉墓在潁上縣

孝子徐汝楫墓在霍丘縣西二里

烈婦吳氏墓在霍邱縣萬言妻吳氏同妹松花

合葬處名曰雙烈

郎中薛蕙墓在亳州城東南一里文徵明撰墓

碑

布政李國士墓在亳州城東南三里八角臺左
尚書王質墓在太和縣崇文門外

滁州

社稷壇在州城北

風雲雷雨山川壇在州城北

勅建先農壇在州治東門外雍正四年遵建

州厲壇在州城北

在縣曰邑厲

里社鄉厲二壇在各鄉保

關帝廟在州西雍正五年奉

旨追封三代公爵春秋同日祭于後殿

城隍廟在譙樓西

八蜡神廟

劉猛將軍廟並在州城

以上壇廟所屬縣皆如制

旗纛廟在衛內

表豐大王廟在豐山頂祀豐山神宋宣和五年
禱雨應賜額曰表豐

漢高帝廟在豐山側唐意高廟碑陰記云漢諸
將追項羽道經此山至今土俗以五月十七日
為高帝生日遠近畢集薦觴焉

宋太祖原廟在羅城外沙河岸東皇祐初通判
滁州王靖言太祖擒皇甫暉於滁州太宗下劉

繼元於并州真宗禦契丹於澶州宜立原廟於
三州以昭遺烈於是命寫太祖御容於滁起端
明殿兼立天慶觀以奉之

柏子龍潭廟在州城外以六月六日祭禱雨輒

應附明太祖柏子潭神龍效靈碑

昔元末帝紀至正十有四

年歲次甲午秋七月朕率兵駐滁陽正禾苗暢
茂之時值天久旱農樹將槁時所帥者衆憂恐
乏食皇皇不已於是詢於滁民之耆年者曰滁
陽郡在方冊其來遠矣水陸英靈孰民懷之語
既郡者默然中有志士楊文素者曰滁之西南
有山曰豐山陽谷有巒巒側有澗名曰柏子潭

淺深莫測神龍出沒往來乎其間前代雨愆期
凡官守於斯者必懇禱於是誠則輒應於是每
遇旱患祈必豐稔滁民懷澤臨淵而建祠先後
人相繼無不仰瞻今天久不雨必詣神祠陳其
所以或者雨乎朕既聽是云即策馬極所在去
將百步稅騎而步趨欽欽而臨淵懇思之洋洋
乎在淵躍躍乎遊雲於是齋馬飯僧臨祠而禱
之初土民有云凡禱之日潭必有異或魚尾於
淵或龜鬣浮於面斯雨澤之先兆者朕亦欲是
至期無見禱已畢矣親躋巖側立淵西崖扳弧
俯視以矢入淵者三祝謂神曰曩有禱於神者
謂神有異今乃無是朕與神約期三日神若我
答無不神敬設杏然還可祠於淵乎祝畢乃歸
是日天朗明日萬里無雲三日其晴愈甚漏當
已正之間纖雲不飛待至午漏將正出視四天
滁之西南豐山之右墨雲一點昭示碧天其巨

如斗噫久旱不雨今碧天萬里所望之雲不過
如斗量豈濟哉果若不答神必我較將有他變
歟於是闕息於中堂頃視外澹影幽陰即出仰
視嗚呼歎然忽然黑雲已徧太虛雷轟天外電
掣九霄霖雨大作時朕冒烈風迅雷即詣神祠
謝神如朕所約邑中去潭多不三里餘比至潭
所在山川滂沱盈溢無不浩浩蕩蕩神乃我答
不傷不溢民獲豐稔朕自去此三十年餘若遇
旱患心目朝向是方意欲詣祠而禱斯慕神之
切也遂於洪武十八年冬十有二月十一日特
勅有司建亭宇刻堅石著神效
靈樹當淵所以昭示澤民之驗

剛烈廟在州治祀宋滁州守劉位金兵至中流

矢死詔建廟號剛烈

滁陽王廟在州治祀明郭子興洪武二年立廟
一在墓次以隣宥氏世為奉祀守王墳

漢王廟在全椒縣西五十里

蔡姥廟在全椒縣南小湖旁宋時滁水泛溢因
建是廟以祈福佑

漢高皇廟在來安縣南五里

忠義祠 節孝祠俱在州學宮內

二祠各縣
俱如制

九賢祠在州城內保豐堂後祀唐刺史韋應物

李德裕李幼卿李紳韓思復宋郡守王禹偁歐陽修張方平曾肇

五賢祠在州治祀宋王禹偁歐陽修張方平曾肇蘇軾

二賢祠在州治醉翁亭後祀歐陽修蘇軾

四賢祠在州城西南豐山九賢祠左祀明李一

鵬高倬王聚奎金光辰

附

明凌義渠記

滁界江淮間賦

役繁重累歲不登黎民半菽不飽當事每厘萬目憂益以金精動宿石鼓鳴山塞上風烟羽書

旁午縣官左右手畫而大江以北尤屬騷劇歲辛巳津撫忽檄召買改運一時奉到咨移滁人當三空四盡之餘不啻燭溺逼矣催檄再下蒸民輾轉流離不忍聞見中丞金公時司喉舌滁民山城不通水道一疏獲封入淮以麥抵解淮重負雖釋強半而外加未豁廷尉李公以南岡賁覲述所經歷及所耳目者上之陳滁人力困不支之狀最悉金公隨具滁和寇荒已極一疏力請蠲豁更及馬價忽增南之九府四州概為蠲新而北直山東河南荒殘處所并荷恩免皇仁所播固不獨滁於時滁之黃童白叟無不舉手如願以歌誦曰維休維吉君子萬年初寇獨熾飄忽楚豫烽燧尚未及滁壬午夏近在金斗兵賊雜沓滁且有震驚恐剝膚凶也先是浙東馮公以滁陽為金陵門戶牧伯駐轄題設環山營兵統以守備屏蔽江干西蜀高公繼至慮徒

手之卒不能袒裼行間枵腹之官不能奮揚營壘制械設俸所以綱繆者畢至關中王公以請丞佐計曰固圉之所憑者神器神器之所憑者硝磺為之捐俸以倡義勸助以裕資勤教習人知衝敵人知規方而滁賴保障矣夫兵之大計人心不宿飽則立解不羽衛則立耗此夫子論政兢兢於足食足兵之為先也西蜀關中承小馮君之後籌兵籌食實為國家留心根本重地而滁人獲邀鞏固中丞廷尉繼念凋敝遺黎脫彼燔溺之危於一時迄今咸沐輕徭之樂得遂畎畝之安民信於此而立所貽於滁人者不更延之有永也哉四先生為國家計長久為民生計安全不獨為滁人計也而安全之澤滁人實先受之滁人食夫安全之澤圖所以不忘夫澤者相與卜築於豐山之側俎豆於九賢之左意與文昭文定京兆贊皇諸公後先晤語也俾蒞

茲土者公餘覽勝生茲土者暇日尋芳顧茲山
高水清仰四先生之風其有所興起也夫主其
事者則署州守孔君尚則學博士沈君鍾秀也
監督視事則州別駕夏君觀署捕照磨王推已
及鄉縉紳諸庠也工竣余乃推衆之意執筆以
識之曰滁人之戴四公者如石於是衆皆坐臥
其下而不能去四公李名一鵬號洧盤浙江慈
谿人己丑科進士辛巳任南太僕寺卿高名倬
號枝樓四川忠州人己丑科進士壬午任南太
僕寺卿王名聚奎號聯珠陝西郿縣人戊辰科
進士壬午任南太僕寺寺丞金名光辰號天樞
一號便巖全椒縣人戊辰科進士壬午任都察
院左僉都御史前
任通政司右通政

王陽明祠在州城内保豐堂右祀明王守仁全

椒縣亦有祠

胡莊肅祠在州治上街祀明胡松

朱文公祠在全椒縣

劉公祠在全椒縣城內祀邑令劉平

漢阜陵王墓在全椒縣東十五里阜陵王光武子延也其塚高大旁即阜陵城

唐給事張原佖墓在州仁義鄉蓼湖東

五代常州刺史張訓墓在州東南二十五里

宋光祿張昱之墓在州昌城鄉安仁村

提點張次元墓在州昌城鄉安仁村

運判吳革墓在全椒縣南十五里

提點王粹道墓在全椒縣甫城岡南

明滁陽王郭子興墓在州沙河之上明初設守塚

戶

學士范常墓州烏衣河北

都督何文暉墓在州城東北沙河上

都督李茂墓在州關山西北

侍郎黃立恭墓在州麻塘橋西南

侍郎劉清墓在州城北三里

尚書胡松墓在州東四十五里

布政孫存墓在州城南拘爺塘

新寧伯譚忠慕在州東秦皇塘左

贈少保于澤墓在州南孤山謙之祖也

御史周冕墓在州東沙河沿

郎中楊于庭墓在州二郎口外里許

中書吳國鼎墓在州花山北小清流關

都御史金光辰墓在州花山羅家凹

南河侯方瑛墓在全椒縣西馬鞍山

祭酒樂韶鳳墓在全椒縣西沿村河

太醫院判魯文質墓在全椒縣西沿村河

都督平安墓在椒縣高塘南二里

國朝郎中金拱敬墓在重熙洞山

和州

社稷壇在州城印山門外

風雲雷雨山川壇在州城梁山門外

勅建先農壇在州治東郊雍正四年遵建

州厲壇在州香泉門外

在縣曰
邑厲

里社鄉厲二壇在各鄉保

關帝廟在州城玄妙觀東雍正五年奉

旨追封三代公爵同日祭於後殿

城隍廟在州治東南

八蜡神廟

劉猛將軍廟並在州城

以上壇廟所屬
縣皆如制

姥廟在州西三十里麻湖之陽祀歷陽神母
有先哲知歷陽將陷為湖後人以為神因立廟
霸王廟在州東北四十里烏江

插花廟在州東北七十里陰陵山祀魯妃即項

王之虞姬

灌將軍廟在州治印山門內祀漢灌嬰

范增女廟在州治內范增女號東城九娘子慶
歷初東寇王倫圍歷陽恍見女守禦遂潰散封
威顯夫人

周侯廟在州治南橫江門內祀宋周全

忠烈廟在州治姬家巷東祀宋郡侯周虎

附明

戴重修忠烈廟記

有宋開禧二年北兵渡江圍和州州守周公力戰却之其

三年州人德公而祠焉嘉定元年祠成知歷陽縣謝德與為之記記攻守狀甚詳時公已移謫

去紹定二年轉和州防禦使會卒淳祐七年謚忠惠賜廟額曰忠烈仍生祠而為之其北堂則以祀公母感義郡太夫人勅辭具於石廟在橫江門內故壯且麗後二百餘年蓋未有新之者及我嘉靖之六年知州易公竄乃廢淫祠於城西之麓徙廟其地而祠賢母於左壩昇二巨碑立廟下自書忠烈廟榜筆力古勁垂且百年又告圯矣諸生王之節亟言於有司召工取材少易朽壤而謂重曰和州南北之爭地也天下有亂和必先之若周公以孤城羸卒抗忠致命推敵保邦節與子願仰師之以勵我國人工雖不克終不可不記其事嘗讀宋史記開禧和州之圍頗不載公却敵之績惟帝紀中一署名耳豈侂冑怒丘崇之斥已因以抑公與他日有事於宋史列傳慎無闕也重題其言書之於版井以祠記永垂祀典云爾

余忠宣廟在州城西隅祀元余闕

旌忠廟在含山縣西北祀宋統制姚興舊立廟
戰所元季燬於火改立今處

忠義祠

節孝祠皆在學宮側

二祠各縣
俱如制

浣紗女祠在州治馬神廟右即古漁丘渡伍員
為追兵所迫於此取渡道饑浣紗女食之員慮
其洩戒以勿言女因抱石自沈後人高其義為
立廟祀之

烈女祠在州城南隅祀宋烈女元孝婦明節婦
十八人

賢母祠在州治周侯廟左祀周虎母何氏

陸秀夫祠在州西南二十里豐山旁

三賢祠在州儒學東廡側祀唐司業張籍太學
生何蕃宋學士張孝祥

三老堂在州治後祀宋太守傅堯俞范純仁劉
摯三老相繼出守皆入相有德政人稱之宋元

祐間建明正德中復建後改為祠

焦太史祠在州治西北隅祀明太史焦竑

香烈祠在州治之西北明懷宗乙亥流寇陷城
知州黎弘基及同知陳德姚學正康正諫教諭
趙世選俱殉難立祠祀之

游定夫祠在含山縣登科橋祀

功臣祠在含山縣東街祀明華高仇成李彬楊

文紀清

烈女祠在含山縣南街

宋侍郎彭思永墓在州城西南延慶寺西封樹如

初

先儒游酢墓在含山縣北十三都有楊時墓誌

銘碑石

元總管韓擒虎墓在州小西門外大岡之上擒虎

為元總管與明太祖相抗不降嘉其忠義卒以

禮葬

明尚書班用吉墓在州小西門外社稷壇之東北
有碑

襄城伯李濬墓在小西門外有石坊並碑

都督僉事陳亨墓在州西北鳳凰山

皖國公仇成墓在州五都

侍郎馬諒墓在州城西北三里

運使王璽墓在州北郭亭之東北半里

知府萬慶墓在州小西門外襄城伯墓旁

學士危素墓在含山縣新東門外

豐城侯李彬墓在含山縣南一都

廣德侯華高墓在含山縣七都宋濂撰神道碑

駙馬都尉王富墓在含山縣西城外

都督紀清墓在含山縣東七都

都督楊文墓在縣東七都

知州張祐墓在縣東城外

國朝訓導劉芳遠墓在含山縣流塘堰

奉政大夫李哀燦墓在含山縣西

余烈婦墓在含山縣運漕鎮

鮑孀姑墓在含山縣黃泥岡

廣德州

社稷壇在州城西門外

風雲雷雨山川壇在州城南門外

勅建先農壇在州城東門外雍正四年遵建

州厲壇在州城北

在縣曰邑厲

里社鄉厲二壇在各鄉保

關帝廟在州治東

國朝雍正五年奉

旨追封三代公爵同日祭於後殿

城隍廟在州治東

勅建八蜡神廟在建平縣善政坊

劉猛將軍廟在東門外

以上壇廟所屬
縣皆如制

顯濟龍王廟在州治南七十里禱雨多應

石嶺真武廟在州南二十五里

東嶽廟在州治東南

祠山廟在州治西五里祀漢張渤

伍子胥廟在建平縣伍牙山上

忠義祠在州學內

節孝祠在學宮左

二祠各縣俱如

制

四先生祠在州治祀仲淹真德秀王叔英周瑛

元判官秦德用建

三忠祠在州治祀宋岳飛明練子寧王叔英

呂祖祠在州治東東亭湖南

九烈祠在州治祀常績王翼潘璠李庚俊王儔
趙時踐趙時晦蔣夔朱嗣孟

六賢祠在州治祀明鄒守益錢德洪王畿耿定
向沈沖王艮又有鄒東廓祠特祀守益

三惠祠在州治祀趙崇賢王邦瑞彭棟

王修撰祠在州治祀王叔英

陸公祠在州治祀陸長庚

邵氏祠在州治祀邵圭

趙公祠在建平縣治東南祀宋叅軍趙時踐

唐尚書劉文靜墓在州治北三十里唐興寺側

宋提點吳應龍墓在建平縣南二十里吳村山

校書郎章汝鈞墓在建平縣

丞相鄭清之墓在建平縣東北四十里

叅軍趙時踐墓在建平縣溪岸闔門死難

明元帥劉成墓在州西七里岡明初以戰歿予守

塚戶加恤焉

修撰王叔英墓在州西祠山東麓建文時殉難

少師楊士奇為題其墓

附

明周瑛記

去廣德城西五里許

王修撰墓在焉修撰故台州人姓王氏名叔英
字原采素有氣節仕建文朝為文士官未幾文
皇帝南巡原采募丁壯廣德遂自經將死自為
贊曰生已久矣未有補於當時死亦徒然庶無
慚於後世又自為詩曰人生穹壤間忠孝貴克
全嗟予事君父自肖多過愆有志未及竟奇疾
忽見鱣肥甘空在案對之不能嚙意者造化神
有命歸九泉嘗念夫與齊餓死首陽巔周粟豈

不嘉所見良獨偏高獨偏難繼偶爾無足傳千載史官筆慎勿稱希賢尋有詔治姦黨其二女赴井死其妻繫獄死人為上其所賦詩上曰彼食其祿自盡其心耳乃置不問初原采將死以書托祠山道士盛希年曰可葬我祠山之麓希年卒收葬之蓋原采希年同台州人故托以後事正統中少師楊公士奇始為題其墓曰嗚呼翰林修撰王原采之墓

烈女趙氏墓在州北七十里趙氏女未嫁聞夫死殉節遂合葬而題其墓曰雙玉

六安州

社稷壇在州治北

風雲雷雨山川壇在州治南門外

勅建先農壇在州治東門外雍正四年遵建

州厲壇在州治北門外

在縣曰邑厲

里社鄉厲二壇在各鄉保

關帝廟在州治東雍正五年奉

旨追封三代公爵同日祭於後殿

城隍廟在州治東

勅建八蜡神廟

劉猛將軍廟並在州治東門外

以上壇廟所屬
縣皆如制

旗纛廟在州治西門

忠義祠

節孝祠俱在學宮西

二祠屬縣
俱如制

臯陶祠在州治北門外塔西明嘉靖間立

大成祠在臯陶祠左明成化間奉旨孔氏流寓

應建聖祠以廣祀事

宋程知軍祠在州城北龍津之上祀宋程端中

國朝張璪重建祠記

知軍祠昔在六安城北龍津之上
明尚書郎林子華請倅六安

為宋知軍程公建也程公名端中洛陽人伊川先生冢祠初舉進士靖康末南渡居池州知六安軍兼營內勸農屯田事金人率眾臨城公殫力守禦力盡而死吏人感其忠勤葬於霍之撞山子孫世守其墓云康熙四十八年冬余承乏守六凡祠宇有闕道義而傾圮古蹟載傳記而湮沒者無不修舉惟知軍一祠因兵燹毀廢而民人之塚久星羅棋布於其地矣禮祭法曰法施於民則祀之故凡有善政皆列名宦以崇報也若公為斯民保障捐軀捍患且大節彪炳于乘志而祠廢不舉可乎癸巳秋進縉紳暨程氏高念祖輩議為重建隨於舊址稍北擇地而量度之鳩工庀材為堂為廡以祀知軍肇于甲午季夏成于仲冬區區舉廢之心於是少慰矣時育明道先生宗子博士佳璫聞余為知軍建祠遠來告余請祀二程子於祠而以知軍從祀為

有合於歐陽所宗所因之義余謂二程夫子孟
韓而後道統斯傳四海之外六合之內莫不奉
儀型而敬祀以知軍從祀於祠誠有合於歐陽
之說但州志所載載知軍之勤事也建祠以祀
祀知軍之忠節也即今之重構亦恐世遠時遐
知軍久虛裡祀等於墜緒之茫茫耳應仍以專
祀知軍以實州乘以昭報功堂後尚有隙地俟
歲終更建三楹祀二夫子於內庶名實符而宗
因之義亦備乎博士曰可遂書而記于石
其襄助與奉祀諸姓名另鐫一石以記

汪學士祠在州城西九十里祀宋汪立信明弘

治二年改石湖寺建立

附

明潘楨記

汪公名立信其先新

安人也曾大父智受六安山水因居焉公生長
此地登淳祐六年進士第理宗見立信狀貌雄

偉顧侍臣曰此閫帥才也嘗充湖南安撫使知潭州至官公仗之物悉置官庫所積錢連歲代納潭民夏稅興學校士習為之變知江陵府時襄陽被圍甚急公上疏請益六安屯兵凡邊戍皆不宜抽減移書似道謂今日之計其策有三似道得書大怒辱罵以危法廢斥之咸淳十年元兵大舉伐宋似道督諸軍出次江上以公為端明殿學士沿江制置使江淮招討使俾就建康府募軍以援江上諸郡公受詔不辭即日工道以妻託愛將金明執其手曰我不負國家爾亦必不負我遂行與似道遇蕪湖似道撫公背哭曰不用公言以至於斯既至建康守兵悉潰四而皆北軍公知事不可成歎曰吾生為宋臣死為宋鬼終為國一死率所部數千人至高郵欲控引淮漢以為後援已而聞似道師潰蕪湖江漢守臣皆望風降遁歎曰吾今日猶得死於

宋地乃置酒召賓佐與飲為表起居三宮與從
子書屬以家事夜分起步庭中慷慨悲歌揮拳
撫膺者三扼吭而卒遺表間贈太傅金明以公
之喪歸葬丹陽厥子麟內書寫機宜文字在建
康不肯從衆降崎嶇走閩以死弘治己酉廷議
毀天下淫祠而六安石湖寺亦在廢中會大中
丞仁和李公昂適駐節茲土乃進父老而問之
故因歎曰按禮以勞定國以死勤事則祀之能
禦大災能卹大患則祀之先生忠誠貫日月使
其策果行宋之為宋未可知也是豈可湮沒也
哉乃檄撤僧廬之座而貌先生之像於中額曰
宋端明殿大學士汪公祠命有司歲時致祭焉
意表前哲勵後人厚俗
之道也是不可以不紀

仇公祠在六安州通濟門外明正德壬申都督

仇鉞解六安圍六人感之肖像立祠

歐陽文莊祠在州城北門外祀明知州歐陽德

史相祠在州東祀明相國史可法

二程夫子祠在英山縣城隍廟後祀宋程顥程

頤

南嶽神祠在霍山頂

三蘇祠在霍山縣治東祀宋蘇洵蘇軾蘇轍

宋狀元焦煥墓在州焦家莊南

知六安軍程會墓在霍山縣撞山下

元淮西總管潘通墓在州西望江灣之南

學士熊德旻墓在霍山縣復覽山下

明御史潘岳墓在州西望江灣南

都御史汪霖墓在州南寶塔岡

光祿楊惇墓州南陟步河

布政使潘貞墓在州西望江灣南

僉事潘鏜墓在州西望江灣南

叅政彭辨之墓在州南陡步河

行人司潘銳墓在州東南蔣家灣

叅政潘子正墓在州東南蔣家灣

知府邱玳墓在州南七里井

都督僉事張澡墓在州南五十里高廟

副使徐必進墓在州西烟墩集

副使何慶元墓在州東郭外東禪堂前

贈太僕楊四知墓在州南聖人山

御史郝錦墓在州北清水湖

國朝編修徐致寬墓在州西徐家集

知府駱士憤墓在州西五里龍王砦

泗州

社稷壇在州治香華門西

風雲雷雨山川壇在州治西門外

勅建先農壇在州治東門外雍正四年遵建

州厲壇在州治西

在縣曰
邑厲

里社鄉厲二壇在各鄉保

關帝廟在州治南門

國朝雍正五年奉

旨追封三代公爵今日祭於後殿

城隍廟在州治西

勅建八蜡神廟

劉猛將軍廟並在州治東郊

以上壇廟所屬
縣皆如制

禹王廟在州治杼橋口

河神廟在州治南

淮瀆廟在盱眙縣下龜山寺西南世傳大禹鎮
水怪處

介之推廟在天長縣浮山

子胥廟在天長縣東北十五里

忠義祠 節孝祠俱在學宮右

二祠屬縣
俱如制

馬邵二公祠在州治南察院祀明馬斯臧邵陞
今圯

顯忠祠在州城內祀明御史李紹賢今祀

義勇祠在州治東岡後移建龍窩驛東祀明蘇

旺兄弟皆正德中死流寇之難

附

明桂祥記

正德

壬申大盜起郊甸渡河踰宿由靈虹犯我雙溝
時義勇士蘇旺蘇智蘇吳兄弟謂朱文玘曰賊
勢雖盛幸未猝至先擊之可挫其鋒乃挺身往
戰各手刃數賊鎮之壯者亦荷戈遙為聲援而
老弱婦女得以渡淮避之賊大至遂皆遇害然
賊亦阻懼西歸雙溝以東不被兵者皆其力也
先時立祠於東岡歲久頽弊今移置於龍窩驛
之東焉知泗州市汝陽桂祥曰四子者草莽賤
臣也為臣死忠為子死孝之道素無師友講明
之功一旦臨大難挺身赴戰死而不悔卒使東

南免於刼辱之禍其功可謂偉矣士大夫平居
高談闊論以綱常自許一遇變故輒辜恩負國
忘恥事讐有市井人所不屑而為之甘心者自
諸義勇視之直直狗彘而已耶夫義以率戰勇
以定功可以風臣道矣乃立義勇
祠祀草莽之豪傑姚衣冠之賊也

呂東萊祠在盱眙縣祀宋呂祖謙祖謙六世孫
伯宗招撫盱眙貽遂家於此

范文正祠在盱眙縣祀宋范仲淹

周濂溪祠在盱眙縣祀宋周敦頤

雙貞祠在盱眙縣東北陡山下祀何氏二烈女

明隆慶間建

包孝肅祠在天長縣東門祀宋包拯以拯嘗為

天長令

朱公祠在天長縣勝因寺西南祀宋朱壽昌

沃公祠在天長縣東門祀明死倭寇難沃田

附

明孫以仁重修祠記

將軍沃公諱田家世山東登州衛指揮同知公自幼

賦性英敏體貌魁梧夙諳韜略登嘉靖己丑武進士第以浙江署都指揮僉事守備儀徵嘉靖丁巳夏五月十日倭寇犯廣陵焚劫甚慘乘勢欲寇天長公奉檄提青州兵為是邦防禦計迺

營兵於崇家岡上待之去縣治東六里許寇聞有公截西路疑遲不敢進十有五日繼聞廣陵追兵四集遂由蘆龍直趨天長公迎擊破之諸寇氣甚沮潛伏莽野日暮天霽氣爽分方戒嚴與各部將籌以生擒諸寇待旦黑霧障天咫尺人不相辨加以東風大作寇乃併力突入人馬潰亂首尾不應公獨躍馬前敵手刃十數人餘寇怨馬陷賊中遂遇害焉嗚呼寇非公之截殺必逕入天長天長素無城池民素無備不其岌岌哉翌日寇旋遁去而殘毒不敢肆諸士女命獲保全皆公之敢戰懼之也夫公不惜一人之身一邑之民命皆賴以生其功誠不細矣時總制梅朴胡公以公狀上聞勅贈鎮遠將軍都督僉事世襲指揮使歲戊子知縣黃泰然奉侍御張公命為公建祠於東門外龍行集中春秋祀之而民為公痛心戴德者歲時復有私祠當時

復有私祠當時同死事者指揮岳君寵百戶劉君葵例得同祀隆慶改元余按茲土過祠而惜其規制未備也爰命知縣楊子龍增樹門廉恢其卑隘新其貌像而氣象規模視昔為尤且大矣夫先王之制祀禮法施於民則祀之以死勤事則祀之以勞定國則祀之以能禦大災捍大患則祀之公之死豈惟禦災捍患而已哉耿耿忠義垂之千古而不磨廟貌血食當歷千古而非諛也司風紀者不當揄揚以表忠魂以勸臣子之精誠報國者哉敬書此以紀其歲月云

雙忠祠在五河縣治北二十里祀唐張巡許遠
大忠祠在五河縣北城臺祀明耿再成

孫烈女祠在五河縣天保宮後女少失恃父鑾

繼娶李氏李攜前夫鄭子來歸鄭屢欲汚女女以刀斷其頸旋自刎死嘉靖間邑令高某為之

樹坊建祠並置祀田數十畝

附

明李穆記

孫烈女者

五河邑安定里人也名老姐父鑾母朱氏女生而聰穎居家毅然寡嬉笑里中人咸異之自幼許聘張氏子舉後不幸朱氏早亡子然與父居父嘗欲歸諸張以圖繼室也適張半獵賈未能娶鑾遂繼李氏與女共家焉先是鄭州兒者李前夫子也李家無依攜州兒以適於孫州兒素恃母寵待女無狀女惟處之端嘉靖丙辰秋九月十有四日州兒見室傍無人即以淫心調女女震恐喊之越五日州兒從工所至值女俯几治麪州兒自後撲女以口吮其肩意其為夫

最心也遂以剃刀反斫不中州兒腹走女即仰
天號哭往訴其姊三姐及嬌舒氏曰吾不幸早
喪吾母父又常出鄭賊時欲污我我決刃之以
自刎不然吾惟有死而已其嬌及姊曲為解諭
強歸然其心忿忿常不忘也丁巳春三月念九
日州兒以取薪給其母曰薪多吾力弗任半委
中途盡取諸母信而往擔薪以歸視房戶內掩
怪而強啓以進見州兒卧南壁下頸未斷者如
線女倚北壁水缸氣息垂絕頸刃自左而右者
痕僅三寸血流滿室未幾亦絕焉但其死所與
奸賊去遠毫髮弗洎顏色服履整整有生氣里
人狀其事於邑令邑令高君異之拘隣戚而博
訪焉其姊三姐嬌舒氏哭而訴曰此女此心自
去秋懷已決矣今果然也因備述所云云高君
心未深然及謀諸四隣四隣曰然詢諸李母母
亦曰有之採諸隣近學宮多士皆曰此衆所共

聞也於是高君為之備衾木崇殯殮一時士民
往弔如市事聞當道巡按侍御堯山吳公頴谷
馬公相繼表其間而例奏請旌焉高君嘉其節
欲識之不朽迺於孫氏家後治瑩瑩前樹石坊
一座置田數十畝以贍時祀復於城內隙地築
臺建堂扁曰烈女祠祠前仍立石碑蓋厚典也
事竣備其實以求予言予亦嘉事之不偶而歎
其有開風教也是為記

明祖陵在州北三十里

周楚懷王墓在盱眙縣治廳後遺跡尚存

宋孝子朱壽昌墓在天長縣東四十五里舊勝因

寺西南旁有祠

明尚書金純墓在州應山集

曹國長公主墓在盱眙縣靈蹟鄉內明太祖皇
姊配隴西王李貞合葬

太原長公主墓在盱眙縣太平鄉牧羊山西南
明太祖皇姊配駙馬都尉汪清合葬

尚書陳道墓在盱眙縣官莊西南

行人李紹賢墓在盱眙縣下龜山

僉事馮應京墓在盱眙縣西南靈山乳

僉事張昊墓在天長縣六里墩之南

御史胡士奇墓在天長縣上白湖之北

御史丁寧墓在五河縣安定鄉

節婦胡氏墓在五河縣南七里黃棟莊

烈女孫氏墓在五河縣南安定鄉

國朝副使周永緒墓在盱眙縣東山

江南通志卷四十二

欽定四庫全書

史部

江南通志卷四十三

詳校官給事中_臣丁雲錦

檢討_臣德生覆勘

總校官編修_臣王燕緒

校對官編修_臣勵守謙

謄錄監生_臣于時和

欽定四庫全書

江南通志卷四十三

輿地志

寺觀

江寧一府

仙佛之宇經始於江南者天保為報上之嘉名崇
元為洞天之華構其後金剎瑤宮建勝幡而啟妙
門者往往標映江山與翠樾丹霞參差高下矣朱
子萬杉寺詩云願以清淨化永作太平基又齋居

聞磬詩云此時鄰磬發聲合前山響起對玉書文
誰知道機長是則朝香夜梵風鐸霜鐘起人天初
覺之心助

聖朝清和之理抑豈可少哉

江寧府

靈谷寺在府鍾山東南舊於獨龍阜建道林寺梁
武帝為寶誌禪師建塔於玩珠峰前名開善宋改
太平興國後改蔣山明洪武初徙山之東偏改名

靈谷自山門入松徑五里乃至寺大殿皆壘甃空
洞而成後有浮圖即梁寶誌禪師幻身改葬於此
塔前有石泉石旁有古松偃幹明高帝月夜掛衣
處

國朝康熙四十六年

聖祖仁皇帝南巡臨幸

賜御書靈谷禪林四字匾額

御書天香飄廣殿山氣宿空廊對聯

御書石刻金剛經一部

御書泥金心經一卷

御書白居易絕句金扇一柄

烟滿秋堂月滿庭香花漠漠磬鈴鈴誰能來此尋真諦

白老新開一藏經

御書木刻藥師經一部

附

新城王士禎遊記

遊鷄籠潭之明日遂往

鍾山過青溪拜侍中黃公祠祠有夫人血影石出
通濟門經天壇壇已廢彌望蔓草紫烟而已沿鍾

山行屢有向背峰嶠蔽虧雲日明晦誦沈隱侯千
雲非一狀蘇端明峰多巧障日之句歎其極工按

江左時刺史還任例種松千頭山在六朝故多林
木勝國為陵園地龍鱗虬鬣彌遍山谷上陵者寒
濤天籟中不復見山今十九供熬爨矣寺燬於乙
酉丙戌間惟無量殿寶公塔存上人於南靈隱豁
堂師法嗣為言寺廢之由乘願而來欲以十年重
興初地午浴樓下樓後面屏風嶺風逢逢自絕壑
下林木颯然有聲飯方丈畢偕上人觀景陽鍾禮
寶公塔予登馬上人不能從問三絕碑亦燬於火
三絕者張僧繇畫誌公像李太白贊顏魯公書也
寺舊有誌公法衣革履吳道子畫折蘆渡江鳥巢
佛印三教畫壁皆不見惟顏壁數版丹青漫漶如
天吳紫鳳顛倒袒褐而已稍東為說法臺址旁即
八功德水榛荆蒙茸無復涓滴南為琵琶街僧雖
拊掌隱若弦絲之音殿前有巨鐵剪鋏大吳字上
人訛為赤烏時物按明高帝初定建康為吳國公
八年為吳王此當是未改元時所作然不識何所

用之上人云相傳山有蛟鑄此為鎮云梅花庵在山門東寒香數百樹尚橫斜山翠中問周顒草堂王安石定林舊址皆不可詳會日夕遂與上人別
樵唱滿山悲風騷屑澗水潺湲屢亂流而渡昔人
登樂遊原詩若為今咏之上人貽予豁堂詩自
蔣陵至青溪遂盡其卷湯休帛道猷之流也

棲霞寺在府東北攝山南齊明僧紹故宅陳江總
有碑尚存隋文帝琢白石為塔寘舍利唐改功德
寺高宗製明隱君碑亦尚完南唐改妙因寺徐鉉
書額宋改普雲寺仁宗賜金寶方碑明洪武初仍
賜額棲霞有王世貞記僧寮倚山架壁各擅其勝

白雲庵紫峰閣尤稱幽峻明覺浪禪師開法於此
笑峰竺菴繼起焉

衡陽寺在府東北四十里清風鄉即古寶城寺昔
朗法師駐錫於此有衡陽神女來聽講因名寺唐
天祐三年徐溫重建寺舊有保大七年齊已重開
衡陽寺古跡詩石刻

草堂寺在府慈仁鄉唐家渡濱大江舊建鍾山西
麓本齊周顒捨宅明洪武七年徙寺於此

嘉善寺在府鐵石山明正統中僧法通建寺賜額
山椒有石佛閣蒼雲崖一線天奇石綺錯崖壑幽
勝焦竑為記

崇化寺在府古高峰院與嘉善寺相連明正統間
重建賜額崖下有泉沸起水面若散花名梅花水
幕府寺在府北幕府山晉元帝渡江王導嘗駐軍
於此梁天監中武帝與寶誌禪師來遊始建寺因
名幕府山有達摩洞

弘濟寺在府北觀音門外燕子磯明洪武初即山
建觀音閣正統初因閣建寺賜名弘濟殿閣皆緣
崖構成危石半空以鐵繩穿石繫棟俯臨大江為
金陵絕景

三塔寺在府神策門外明永樂間建

香林寺原名興善寺在府太平門內明時建

國朝康熙三十八年

聖祖仁皇帝南巡改為香林寺方丈內

御書覺路二字匾額

佛國寺在太平門外鍾山之西古華嚴菴也明景

泰間建賜額

翼善寺在府東南相傳晉謝安高卧東山及與張
元圍碁賭墅即其處梁資福院武帝建淨名院神
僧寶誌說法於此宋元改淨名寺明正統間重建
賜今額

定林寺在府東方山宋乾道間建鍾山舊有上定

林寺寺廢移其額於此明弘治間重建有昭明讀書臺石龍池諸勝

天寧寺在府高橋門外祈澤寺北五里青龍彭城二山之間山林幽迴野泉散落人跡罕到宋治平

間建

附

明顧璘遊天寧寺記

正德丁丑春予兄東橋先生赴官台州予

出錢於祈澤寺酒數行東橋別去予與諸君共宿祈澤舊聞隣寺號天寧者境絕幽夔次早邀諸君遊從僧借小童導騎緣寺前逕登山厯墟墓數處即平野曠然兩旁皆童山環抱縱轡行里餘見山盡處如門闕狀闕外諸山濃淡晦明如畫方愛玩未已覺山腹間隱隱有樓閣在空際到即寺也衆

皆大喜棄馬振衣緣石逕而登逕且半間陂陀下
灌莽中有聲洶洶如雷奔風怒予謂諸君此當有
異泉乃遣人蹤跡之徐步入寺寺僧多出乞食獨
老僧惠禧者見客至似喜延入室焚香供茗甚肅
室亦雅潔不類荒山少憩復出寺先所遣人來報
山下果得泉但荒翳不可入予奮然先行藤梢竹
刺時絰冠袂輒絕之以去稍下見泉珠零玉散飛
落石澗中可十數處不知所從來亦莫能極其所
止澗闊尺餘兩旁及底皆山石自然所成玲瓏崢
嶸清泉如空碧下漬予喜呼酒飲擇泉流平緩處
列坐汎觴引滿數觥而出回及山半得泉脉樹間
乃平地湧出不甚瀾溢不知何緣流衍之廣乃爾
既登復觴寺外石
上數行乃上馬歸

莊嚴寺在府治東高橋門外晉永和四年謝尚捨

宅建宋大明中路太后另建莊嚴寺於西樂園改此為謝鎮西寺金陵新志云謝尚莊嚴寺已改興嚴寺考謝尚宅又在城中竹格渡不知何年徙此明永樂間僧真常重建仍前名江總舊有寺碑

祈澤寺在高橋門外祈澤山宋少帝景平元年建名祈澤治平寺梁即寺置龍堂龍池在馬會昌中廢南唐昇元間復宋改祈澤寺為祈禱雨澤之所本業寺在府麒麟門外宣儀鄉梁天監九年建有

唐乾德年寺碑

慧居寺在府治東六十里句容縣界寶華山相傳
為梁寶誌公道場故名寶華久廢明嘉靖間僧普
照建寶公庵萬厯間僧妙峰奉勅建銅殿賜名聖
化隆昌寺

國朝順治二年僧見月建白石戒壇康熙四十二年
聖祖南巡

勅賜慧居寺額

御書心經一卷金剛經一卷四十六年

南巡

駕幸山中

賜飛白大書蓮畝雲香四字額懸於銅殿精持梵戒四字

額懸於戒壇雍正十二年總督趙弘恩奉

旨重修

雞鳴寺在府城北雞籠山與臺城相接晉永康間

倚山為室始建道場明洪武二十年改剏雞鳴寺

置門三曰秘密關觀由所出塵徑皆賜額也遷靈谷寺寶誌公法函瘞於山麓建浮圖五級

國朝康熙四十四年

御書雞鳴古蹟四字匾額

同泰寺在府北臺城內梁大通元年武帝幸寺捨身宋為法堂寺明為營衛地

清涼寺在府西北石城門內清涼山吳順義中建為興教寺南唐為文益禪師道場後主嘗畱宿寺

中有未能歸去宿龍宮之句宋太平興國間改清涼廣惠寺蘇軾嘗捨彌陀佛像於寺中有詩明洪武初賜今額左上為清涼臺俯視大江即南唐翠微亭舊址登覽最勝西偏為善慶菴幽潔高爽莫愁湖朗然在目寺舊有董羽畫龍李後主八分書李霄達草書時人目為三絕

鐵塔寺在府治西北冶城後岡劉宋泰始中建名延祚寺唐有靈智禪師生無目能通曉經論時人

稱有天眼為建塔今寺廢獨塔存

永慶寺在府北門橋之西與謝公墩相近梁永慶公主建又名白塔寺明洪武中重建賜今額

吉祥寺在府清涼山之北宋治平二年賜額後有古梅虬枝鐵幹扶疎數畝

金陵寺在府定淮門內馬鞍山唐沙門貫休建

靜海寺在府西北儀鳳門外盧龍山之麓明永樂間內監鄭和使西洋歸因建寺賜額

普緣寺在府城西北隅晉名耆闍寺

大報恩寺在府城南聚寶門外古長千里吳赤烏
間康僧會致舍利吳大帝建寺及塔晉太元九年
劉薩訶於越王城望氣得舍利於此建長干寺梁
武帝發塔下舍利及爪髮髮青紺色帝命復修塔
瘞之南唐時寺廢為營廬久之舍利數見感應宋
祥符中釋可政表其狀復建寺賜塔號聖感舍利
寶塔天禧二年改為天禧寺明永樂十年勅建塔

九級賜額大報恩寺御製碑記塔高百餘尺皆五色琉璃頂冠黃金照耀雲日江山城郭悉在憑眺中篝燈百二十有八居民點炷無虛夜數十里風鐸相聞星光的爍明嘉靖間大殿燬惟塔存

國朝康熙三年重修二十三年

聖祖南巡

駕嘗幸塔之最高頂

御書不二法門四字匾額懸於大殿

御製幸報恩寺詩一首

恭紀首卷

又每級

御書一額曰一乘慧業二儀有象三空勝地四海無波五律精嚴六通真諦七寶蓮花八表同風九有弘觀又

賜金佛一尊金剛經一部供奉塔頂

御製登報恩寺浮圖詩一首

恭紀首卷

三十八年塔燬

特頒帑金修建

御製修報恩寺塔初畢登之詩一首

恭紀首卷

附明盛時

泰塔賦

出都門以游衍兮經長干之故墟瞻寶塔之翠峯兮心四顧而踟躕始卜築於孫吳

既再興於晉馬獲石內之三珠得函中之半髮光
煜燿而亂輝色青紺而騰發惟金粟之自炯出玉
毫而普現乃寶氣之燭幽故慈光之上燁歷塵劫
而獨存超人天以自展惟明祖之龍興兮振大法
於將隳既離明之繼照兮拓弘基而建之念櫛沐
之久劬兮哀罔極之難報證寶地以舒虔兮仰提
慈而洞照發膚念於淵衷兮沛綸音於天詔遂乃
近徵畿甸遠募荒陲畫甄工之意巧極目匠之伎
奇準宮闕以立極擬路寢而築基備百制之儲萃
煥五色之葳蕤飾隨材而殊質彩呈體而異施盤
后土以奠方兮浚重泉而作鎮擁蓮趺以旋規兮
列朱楹而作蹬映紺殿以孤蹇兮起廡廊而直踞
出木末以高標兮踰臺顛而獨峻故遠而視之則
噌嶮嵒嶮一何高也崢嶸巖岬又何麗也嵒峴嵒
峴誠可駭也嶙峋燿燿亦何異也玲瓏煒煒炫輝
惻惻若海藏之涌生焉巍巍嵯嵯紛葩爛熳若空

界之幻成馬竦露盤於雲中兮峙金相於天闕開
八戶以翕施兮盤九曲而截葉剛風寥寥拂其上
兮灝氣汨汨旋其根勢嶮峻而直矗俾喬嶽以失
尊掩映雲表若隱若彰荒陵旻昊輝輝煌煌心仰
瞻而內悸兮目搖搖以喪精魂淫淫以自失兮睫
閃閃而若驚於是詳其制度觀乎窈冥崇基詭制
巨構殊形高踰三八數邁徑三非尋丈也鉤闕簷
牙坐計甲乙非斲削也闢以八維虛實其四順陰
陽也列牖設簷婉婉轉洞徹通明暗也楚翫翫以
固兮盤鉛錯以為堅懸鈴鐸以為振兮胥蚌蠣以
為緣列巨靈以顯化兮飾諸像以感緣冠纓鎖胄
悉其飭兮耳目眉髮暨其全虎豹犀象蹲其下兮
蓮雲蔓鉢嵌其巔外侈極於弘麗內縝綴於精微
上標極於峻迴下盤固於無倪雕欄婉轉而逶迤
兮瑣闥軒翥而引張勢緣續紛以相齧兮斗拱奮
起而翱翔翔螭頭岫岫以交結兮豹尾黃緣而橫當

懸棟嶙峋而撐柱兮綺阿露佩以飄颻鏤鏤煌煌
而煊炫兮布置絳繹以縱橫飛梁偃蹇以翕翼兮
層櫺嶮岨而昂藏金除輝燭而赫起兮皓壁螢液
以韜光於是極目而矚則長江渺渺其來帶兮羣
山隱隱而如垤闌闌遠其稠依兮城闐聳其密疊
塵市迴其千圖兮衝衢委其四列阡陌交其膝偃
兮原隰互其明滅趨視若燭龍之下翔佇瞻恍火
齊之上騰昕暮互其變態兮風靈鬱其聿蒸倏現
彩於罔測兮忽幻質於虛無既作鎮於神京兮又
翹準於皇都極寰海之淨土兮孰茲塔之可如誠
法界之偉觀兮擬冥工之所鑊匪近知其可詮兮
恍神鬼之自符願照迷方於十地兮續慧性於八
區庶普人智於罔極
兮注洪澤以沾濡

天界寺在聚寶門外善世橋南舊在城中大市橋

北元名龍翔集慶寺明初改天界寺洪武戊辰災徙建今所寺中萬松菴半峰亭最勝

能仁寺在聚寶門外天竺山舊在古城西門劉宋元嘉中文帝建名能仁寺楊吳太和中改報先院南唐昇元中改興慈院宋政和中改能仁禪寺明洪武戊辰移建今地

碧峯寺在聚寶門外晉瑞相院唐貞觀中勅褚遂良重建改翠靈寺宋淳化中改妙果寺元至元中

改鐵索寺明洪武中勅建居異僧金碧峰因名

普德寺在聚寶門外明正統間勅建前後山蒼翠
環遶松林深茂旁接雨花之勝

高座寺在雨花臺梅岡上

永福寺在天竺山前能仁寺東本晉開福寺後徙
此

永寧寺在府梅岡古名剎昔高座亦名永寧今為
二寺後有方孝孺景清二祠其地高敞羣峰環繞

上有木末亭南對雨花北眺鍾陵據南岡之勝永
寧泉出其下

安隱寺在雨花臺即古安隱院明永樂初重建賜
額北接高座南連寶光東對永寧岡隴相接樓宇
掩映風景極勝

寶光寺在梅岡東南舊名天王寺劉宋大明中建
梁昭明太子果園楊吳時又為徐景通園南唐保
大間更建奉先禪院後堊曇師起塔遂名寶光塔

院元改為寺曰普光明初復今額

永興寺在梅岡下明成化初賜額

普照寺在永興寺旁元至大間建明成化間重修
賜額

惠應寺在永興寺旁明正德中建

西天寺在報恩寺後號國公墓右明洪武中西域
僧班的達居此示寂勅建賜額

德恩寺在西天寺東晉普光寺基明正統間重建

賜今額

弘覺寺在府南牛首山梁天監間建名佛窟唐大
歷元年代宗因感夢勅修浮圖七級宋太平興國
二年更名崇教寺明正統間改賜今額茲山為唐
法融禪師開教處入門有白雲梯石磴百級銀杏
一株蔭蔽天日緣石徑而上為觀音閣為兜率崖
又上為文殊洞洞旁有含虛閣巒壑萬狀踞牛首
之勝舊傳牛首山下有辟支佛窟宋大明中移郊

壇於山之東峯執事者於西峰石窟見一僧趺坐
問之忽不見遺錫杖香爐瓶盂而已梁徐度建寺
因名佛窟舍利塔在文殊洞下影入禪堂隙中倒
掛佛几陰晴不改西峯又有方塔在文殊洞前
花巖寺在府南幽棲山陰即古獻花巖唐高僧懶
融居此有百鳥獻花因名明成化間建寺賜額

幽棲寺在府南三十里花巖山前劉宋孝武時建
唐貞觀初法融禪師居此更名祖堂楊吳太和中

改延壽院宋治平中復改今名

慧光寺在府西南新亭鄉宋治平間建名古光宅寺雲光法師講經於此明洪武初重建賜今額

寂照寺在府慧光寺東蹊路自樹杪而下極幽邃靜明寺在府安德鄉寂照寺西有玉華泉出山下崇因寺在府城南十里石馬山之陰新亭舊址也有王謝遺跡劉宋時名曠野寺唐開元中以懶融嘗居改禪居院宋改今額

永泰寺在府城南吉山梁建南唐葬淨果禪師亦
名淨果院

祝禧寺在府安德門外明正德間建賜額

華嚴寺在安德門外古刹也明永樂間重建

天隆寺在石子岡牛首山北明宣德間建

江心護國烈山寺在府西南烈山上

三山寺在府西三山之麓本古刹明洪武十三年
復建

瓦官寺在府城西南隅晉興寧二年移陶官於淮
水北遂以南岸陶所建寺故名瓦官內有獅子國
所獻玉佛戴安道手製佛像顧長康維摩圖世號
三絕南唐昇元中改為昇元寺并以名閣明嘉靖
中改為古瓦官寺建閣曰青蓮

鳳遊寺在府治西南鳳凰臺之右即保寧禪寺也
吳大帝赤烏四年為西竺康僧會建寺名建初宋
元嘉中有鳳翔集此山因建鳳凰臺於寺側名寺

曰祇園昇明二年得外國甌為白塔名曰白塔寺
唐開元中改為長慶寺韓擇木書額南唐保大中
為先主造寺因名奉先宋高宗幸江寧權以寺為
行宮明嘉靖間名為上瓦官寺焦竑易今名

承恩寺在府城中三山街東明御用監王瑾故宅
景泰間改宅為寺

古鹿苑寺在府城東南隅金陵驛舊為蕭帝寺今
石觀音院也宋元絳重建鹿苑寺記云殿有聖像

即山而成寺後有周處臺佛殿前有郗氏窟舊傳
郗后化蟒於此今鷺峰廻光二寺世云是鹿苑寺
舊址誤也

鷺峰寺在府城中鈔庫街南齊為東府城梁為江
總宅唐乾元中刺史顏魯公置放生池東接青溪
北通運瀆宋淳熙間待制史正志移於青溪之曲
明天順間即其地建寺賜額曰鷺峰

廻光寺在府城中去鷺峰寺半里梁天監間勅明

永樂間有廻光大士自西域至重建故名

普惠寺在府三山門外明永樂間為唱經樓天順

年重修賜額

封崇寺在府三山門內一名臥佛寺

國朝王士禎遊金陵城南諸刹記

二十二日自烏衣巷出聚寶門遂造報恩

寺寺即古長干明金陵八大寺之一也龍象鉅麗
甲諸刹登九級塔四望俯視金陵城闕旭日飛甍
參差可見西瞰大江南望牛首祖堂如玉笏犀株
東面蔣山紫雲丹巘出沒烟霧鬱作龍蟠近眺泰
淮青溪三十六曲才若一線舸子如驚蛇蝶儵忽
往來大不盈尺雲逢逢起腋下鳥俯其背忽憶唐

諸公詩塔勢如湧出連山若波濤所謂眼前有景
道不得也僧言順治戊戌雷起塔中塔震壞有田
姓兄弟四人張姓者一人不用一絆一木數日而
工成於最高欄楯上步立游龍飛鳥無以過殆蒙
莊所稱伯昏無人臨百仞之淵背逡巡足二分垂
在外為能外生死至人者耶天界寺在報恩東南
人家沿溪居多以畧約通出入數折得寺門松栝
踈古篁竹幽邃後為鳳山觀轉輪藏登毘盧閣閣
前叢竹中有姚恭靖公碑又二碑皆記明初賜田
之數碧峰寺者即唐褚遂良翠靈寺以碧峰禪師
易今名師嘗自言坐下當出三虎一彪蓋榮公也
洪武中師出使西洋今十八沉香羅漢猶是西域
物萬歷中崇川顧氏竊其一以祈嗣數見怪異還
之乃已寺僧出正統十年賜藏經勅諭墨澤如新
遂迤邐登高座寺秋草滿庭闕無人跡遐想王謝
庾卞之風為之慨然過梅將軍廟廟祀晉豫章內

使梅願願字仲真嘗進孔傳尚書者拜方景二公祠方祠舊在岡上古木末亭側喬木數百章

國初邵某者來作令盡伐之亭與祠並圯今亭祠皆徙而北雖松數株殊失古意按景公陝之真寧人靖難時十二族並死事最烈從叔霽者以耕釣寄真州得不絕如幾壁上陽羨朱君一詩頗奇今記於此慷慨誓死心不移欲死不死將何為欲揮豫讓橋下劍欲操博浪沙中椎衣緋如火如衣衰懷刃如雪甘如飴疾行犯駕氣何壯千秋萬世當如斯誦之勃勃有生氣可以廉頑立懦也考革除之際以身殉國者自勛戚大臣下至樵夫門卒之流凡數百人人人才之盛古今無與為比雖功名如三楊不免射鉤之恥得與諸公朽骨抔土爭千秋萬歲之名哉王稔者方公之門人負骸骨葬聚寶山復輯公遺文為侯城集傳於代亦文氏之王鼎翁云

崇明寺在句容縣東北隅晉咸熙中建名義和梁
昭明太子書額宋太平興國年改今額寺有浮圖
甚峻鐘樓有趙孟頫手蹟

興教寺在句容縣治東北晉咸寧間建

金華寺在句容縣治東南晉咸康三年尚書令李
邕捨宅造靈曜寺宋改今額

開福寺在溧水縣南門外萬壽橋西唐開元間建
名天興寺宋改今額

上方寺在溧水縣西二十五里本古剎舊傳為孫
鍾種瓜處鍾富春人吳大帝之祖也早孤事母孝
嘗於此種瓜有三少年造鍾乞瓜鍾事之惟謹三
少年指山下善地示之行數百步即化鶴去鍾如
其言後子孫果昌至今其鄉曰思鶴鄉

崇慶寺在溧水縣東南八里梁大通間鴻鶴禪師
在東廬山建道場後至中山西建寺宋改今額建
炎兵燬餘枯檜二株

華勝寺在溧水縣南三里舊在思鶴鄉佛子墩宋
乾道五年移寺額復興於此

興教寺在溧水縣大西門外唐天復時勅

無想寺在溧水縣南十八里杜城山麓唐武德時
建宋時掘土得石觀音像祀於後閣寺門外有古
柏二株寺西有南唐韓熙載讀書臺

廣嚴寺在溧水縣北四十里唐天復三年勅
明覺寺在溧水縣西四十里唐咸通十年勅

興化寺在溧水縣東北三十里唐大中時建名豐安寺宋改今額

妙果寺在溧水縣東三十五里白鹿鄉舊在安興鄉唐時所建也宋嘉祐三年移此

興善寺在溧水縣西四十里左山中舊傳即黃初平牧羊處唐大順中建

般若寺在溧水縣南四十五里儀鳳鄉宋嘉熙三年建

大通寺在溧水縣東北十五里梁大通九年建

太安寺在溧水縣東北三十里長壽鄉唐天祐三年建

永壽寺在溧水縣西北明萬曆三十六年建

保聖寺在高淳縣東五里唐貞元中建名龍城宋祥符中改今額

禪林寺在高淳縣東二十里唐咸通中建

龍化寺在高淳縣南五十里唐咸通初建

顯慈寺在高淳縣西四十里唐中和間建名劉莊
寺宋紹興中改今額

飛來寺在高淳縣西南三里相傳明天啓二年中
秋夜有銅像彌勒一尊端坐太平圩之東角因建
寺名曰飛來

定山寺在江浦縣東北三十里獅子峯下有泉出
殿中亦名定山泉

石佛寺在江浦縣東北十八里宋建炎中建

東濟寺在江浦縣西三十里舊名湯泉院宋元祐中重建

接待寺在江浦縣治西門外明洪武初建

長蘆寺在六合縣南二十五里宋天聖中建

靈巖寺在六合縣東十五里靈巖山上唐咸通中建

卧佛寺在六合縣東北南唐保大中建

寶聖寺在六合縣北四十里屏山之北元至和元

年建有泉亦名寶聖

祇洹寺在六合縣北五十里冶山唐開元間建

盧龍觀在府西北盧龍山與儀鳳門相接明高帝克偽漢陳友諒親樹旌麾督戰於此山及即位改為獅子山環以城建觀其上

靈應觀在府烏龍潭側與石城門近宋名恩隆祠明正統間以禱雨有驗賜今額

洞玄觀在府東方山之麓葛仙公白日飛昇處吳

大帝赤鳥二年建唐貞觀間併入巖棲觀明重建
洗藥池鍊丹井猶存

紫芝觀在府鍾山下

仙鶴觀在府東北仙鶴門外漢時建

玄真觀在府中和橋北明永樂十八年建

玉虛觀在府東上方門外吳時勅唐保大間重建

朝真觀在府淳化鎮東明正統間建

清源觀在府城南雨花臺側宋建

棲真觀在府南安德鄉明正統間建賜額

佑聖觀在府西江東門外明成化二年建

青元觀在句容縣治西南隅葛洪故宅梁天監中
建

五雲觀在句容縣華陽洞西五雲峰下宋天聖中
建

聖祐觀在句容縣大茅峰頂創於漢宋淳祐中賜
額

玉晨觀在句容縣大茅峰下舊傳高辛氏時展上
公於此得仙後周有郭真人巴陵侯漢有杜廣平
東晉有楊真人許長史梁有陶弘景唐有李元靜
南唐有王貞素俱在此得道梁為朱陽館唐太宗
時為華陽觀明皇時為紫陽觀宋祥符初改今額
世稱為茅山第一福地

崇壽觀在句容縣大茅峰之下華陽南洞側晉任
敦舊宅劉宋元嘉十一年始建壇宇齊建元初名

崇元館宋大中祥符七年勅賜今名

附

元虞集碑

記

大茅山之下當華陽南洞之便門有崇壽觀者本晉洞天館主任敦故宅宋元嘉十一年路太

后始建壇宇太始中廬陵太守孔嗣之重立以奉曲阿高士華文賢齊建元二年勅句容王文清仍立而主之名崇元館武帝以太子時至焉唐貞觀初勅改為崇元觀有太極元年所樹碑石完而文泯可識者左拾遺孫處懸文楊幽經書數字而已天寶七年李元靜先生奉勅重修復民百家脩葺葺寶厯三年主者有賀恩寶則因器物銘識而考見者也宋大中祥符七年勅賜今名大元至治二年句曲外史張君嗣真始來主之顧瞻方臺近對南面左峰疊玉右引大茅之支而回合焉定錄君授言大茅山下有泉水近水口處可立靜舍陶隱居云近南大洞口有好流水而多石少出便平比

有王文清居之則此觀是矣乃嘆曰山中館宇自
齊梁唐宋至於今代有增益求諸晉人之舊惟此
與玉晨許長史宅耳而吾所治乃傾廢隘陋特甚
豈不在我耶於是度材鳩工更後堂為太元殿以
復舊規象三茅君於中東為任華王李賀五君祠
西為陶隱居祠充前殿基為弘道壇自製銘其上
壇東為元武祠西為廣惠祠後為文賢講堂而前
都門門外浚古津池盡受大茅南面諸原之水循
池西南得昭明太子讀書臺臺東有井曰福鄉井
福鄉者因昭明道館名也出諸榛莽著文刻石覆
之以亭而巖洞泉石之勝近在百步內者皆按圖
表之可以觀覽泰定元年上清四十五代宗師劉
君大彬朝京師授予始末俾為之次第焉張君吳
郡人名天雨內名嗣真字伯雨別號貞居所著外
史山世集三卷碧巖懸會錄二卷
又尋山志十五卷考索極精博云

崇福觀在句容縣茅峰西白雲峰下初華陽宮
道士王景溫退居結廬於此宋紹興間詔即所居
建觀

乾元觀在句容縣茅山大橫山下梁天監中陶隱
居勔鬱罡齋天聖間改賜今額有觀妙先生碑後
閻希顏李徹度皆修煉於此

紫陽觀在句容縣茅峰下崇禧宮左

太平觀在句容縣茅山側即陶隱居華陽館也宋

元符中改今額

抱元觀在句容縣茅山柳谷泉舊名柳谷菴宋政和八年因陳希徵修行於此賜今額

清真觀在句容縣茅山大羅源中宋政和中建紹興間每歲三月十八日四方道人會此時多鶴至謂之鶴會

香山觀在溧水縣城東北隅元時所建明嘉靖間學宮圯縣令易觀址建學移觀於縣治東

尋仙觀在溧水縣治東南仙壇鄉梁建

白石觀在溧水縣治東南六十五里荆山中舊傳
卞和獲玉之地有卞和塑像李白詩云白石分金
井丹砂布玉田是也井僅三四尺投之以石則水
上沸如珠

祠山觀在高淳縣治南至元初建

尋真觀在高淳縣治北

萬壽觀在高淳縣寶陽門外宋時建

玉虛觀在江浦縣浦子口

玄真觀在六合縣治西高岡之上宋隆興初建

慈應菴在府東麒麟門外龍潭大道

國朝康熙六年建

古林菴在府吉祥寺之左明萬厯間律師古心創建

水草菴在府通濟門外明萬厯間建有放生池

圓覺菴在府南馴象門明萬厯年建律僧白齋燃

指臂苦行拓修

濟生菴在府石城門內西隅烏龍潭南 以上諸

菴皆接衆之所

隱仙菴在府城西北虎踞關側相傳宋陶弘景隱
居於此故名明初冷謙諸真人多遊此王思任有
碑記

龍華菴在府城銀鼎橋西康熙五十九年按察司
葛繼孔置地延僧寶光募建

孤舟菴在江浦縣西門定山珠泉側明萬厯丁酉
年建

朝天宮在府城西石城門內崇道橋北即吳冶城
也晉為西州城劉宋為國學後廢置總明觀以居
儒士尋以道者居之仍舊觀名楊吳建紫極宮徐
鉉作記云冶城峻址西州舊宇卞忠貞之遺壠郭
文舉之故臺宋元屢改額明洪武十七年重建易
今名

洞神宮在府城淮清橋西宋景定間建元李孝先
有記

真武行宮在府東南洪武門外舊為神樂觀明初
郊祀習樂之所

天妃宮在府獅子山下儀鳳門外明文皇帝遣使
海外遇颶風天妃現像護之奉勅建此有御製碑
崇禘萬壽宮在句容縣茅山華陽洞南門之東唐
王知遠師陶弘景得其道法見知於太宗貞觀初

置觀居之元改今額趙孟頫書碑記

元符萬寧宮在句容縣茅山積金峰下宋嘉祐中
蜀人王畧結廬煉丹於此後道士劉混康居之徽
宗賜額

祠宇宮在句容縣中茅峰西唐天寶中勅建

紫竹林在府城北耆閣山麓明末顓愚禪師建

祇陀林在府城西南隅鳳凰街之南明末建徑山
雪嶠天童五峰皆駐錫於此

三官堂在府城武定橋東明洪武中建

江南通志卷四十三